

Ha'u hakarak fó obrigada ba Prezidente Partidu Demokrátiku Mariano Assanami Sabino no PD nia dirigente senior-sira ba oportunidade hodi koalía kona-ba kooperasaun ne'ebe lao daudaun entre Timor-Leste no Estados Unidos Amérika.

Kooperasaun ne'e kobre tópiku lubuk ida no apoia parte ida husi Timor-Leste nia meta-sira ne'ebé importante liu – maka dezvoltimentu ba ninia instituisaun demokrátiku sira.

Estados Unidos enkoraja prosesu demokrátiku iha Timor-Leste. Ami nia apoia foka liu ba fortalese partidu polítiku sira-nia kapasidade no prátiiku-sira.

Estados Unidos Amérika hasoru partidus polítikus hotu-hotu iha Timor-Leste iha tinan tomak hodi atinje meta ne'e.

Ami mós serbisu ho Timoroan sira-nia instituisaun-sira ba jestaun eleitorál no organizaun sosiedade sivil-sira ne'ebé halo obzervasaun ba eleisaun-sira, envolvimentu síviku no edukasaun ba eleitór-sira.

Purezemplu, Konsorsiu ba Fortalese Eleisoens no Prosesu Polítiku – lansa iha tinan rihun-rua-sanulu-resin-noon (2016) liuhusi akordu ho durasaun ba tinan-tolu, akordu kooperasaun ho valór dolar amerikanu miliaun haat (\$4 miliaun) entre USAID no International Republican Institute – harii bazeia ba progresu ne'ebe atinje ona iha Timor-Leste nia dezvoltimentu demokrátiku.

CEPPS fornese formasaun ba kuadru tékniku sira iha Parlamentu, dezvoltolve kapasidade atu halibur públiku nia hanoin kona-ba política no projetu lejizlasaun sira, no mobiliza sosiedade sivil ba monitorizasaun parlamentár.

Projetu ne'e mós foka ba feto-sira-nia papel iha Parlamentu liuhusi dezvoltimentu Grupu Feto Parlamentár. Ami kontinua apoia partidu polítiku-sira no organizaun sosiedade sivil-sira hodi hasae liutan feto-sira-nia partisipasaun, joven-sira no ema deficiente-sira iha prosesu demokrátiku. Liuhusi CEPPS no esforsu-sira seluk, Estados Unidos Amérika sente orgulhu hodi kontinua ninia parseria forte ho Timor-Leste hodi promove demokrasia ba ema hotu-hotu.